



## საქართველოს გაერთიანებული სახელმწიფოს და სოფლის მეურნეობის მინისტრი

### ბრძანება N 2-428

13/04/2021

ქ. თბილისი

#### ვანის მუნიციპალიტეტში, სოფ. სალხინოს მიმდებარე ტერიტორიაზე მიწისქვეშა მტკნარი (440 000 მ<sup>3</sup>/წელიწადში) წყლის სამეწარმეო მიზნით მოპოვებაზე სკრინინგის გადაწყვეტილების შესახებ

სსიპ წიაღის ეროვნული სააგენტოს მიერ, გზმ-ის საჭიროების დადგენის მიზნით, საქართველოს გარემოს დაცვისა და სოფლის მეურნეობის სამინისტროში წარმოდგენილია ვანის მუნიციპალიტეტში, სოფ. სალხინოს მიმდებარე ტერიტორიაზე მიწისქვეშა მტკნარი წყლის (440 000 მ<sup>3</sup>/წელიწადში) მოპოვების სკრინინგის განცხადება.

წარმოდგენილი დოკუმენტაციით დგინდება, რომ სალიცენზიო ობიექტი, რომელიც წარმოდგენილია ორ უბნად (8-10 მეტრის სიღრმის 2 შახტური ჭა) მდებარეობს ვანის მუნიციპალიტეტში, სოფ. სალხინოს მიმდებარედ, შპს საქართველოს გაერთიანებული წყალმომარაგების კომპანიის კუთვნილ ტერიტორიაზე, ზღვის დონიდან 45 მეტრის სიმაღლეზე. შახტური ჭების კოორდინატებია: X – 296879.143, Y – 4663807.2055; X – 296871.3263, Y – 4663882.4751. სალიცენზიო ობიექტი ორივე უბანზე თავმოერთულია რკინაბეტონის თავსახურით.

სკრინინგის განცხადებაზე დართული გეოინფორმაციული პაკეტის თანახმად, სალიცენზიო ობიექტი მდებარეობს კოლხეთის დაბლობზე, მდ. რიონის მარცხენა ჭალისზედა პირველ ტერასაზე. ჰორიზონტალური რელიეფის მქონე ტერიტორიაზე, რომელიც ურბანიზებულია და ათვისებულია სამეწარმეო დანიშნულებით გამოყენების მიზნით. ჰიდროგეოლოგიური დარაიონების მიხედვით სალიცენზიო ობიექტი მიეკუთვნება ნაპრალოური წყლების აჭარა-იმერეთის წყალწნევიან სისტემას. წყალშემცველი ჰორიზონტი წარმოდგენილია თანამედროვე ალუვიური ნალექების წყალშემცველი კომპლექსის სახით, რომელიც ლითოლოგიურად წარმოდგენილია კაჭარ-კენჭნარით, ქვიშებით, თიხნარისა და თიხის შუაშრეებით და ლინზებით.

ქიმიური შემადგენლობის თვალსაზრისით მოსაპოვებელი წყლები ჰიდროკარბონატული კალციუმიანი და კალციუმიან-ნატრიუმიანი ტიპისაა, საერთო მინერალიზაცია მერყეობს 0,3-დან 0,5 გ/ლ-მდე. წყლებს ახასიათებს ცვალებადი სიხისტე. გეოინფორმაციული პაკეტის მიხედვით, მიწისქვეშა წყლების ტემპერატურა შეადგენს 11-16° C-ს და მათი სანიტარული მდგომარეობა დამაკმაყოფილებელია.

წარმოდგენილი სკრინინგის განცხადების მიხედვით, საპროექტო ტერიტორია შესწავლილია ჰიდროგეოლოგიური ძიების სტადიაზე, სალიცენზიო ობიექტის ზუსტი დებიტები უცნობია, თუმცა, ჰორიზონტის წყალშემცველობის ხარისხის გათვალისწინებით, მოთხოვნილი, წელიწადში 440 000 მ<sup>3</sup> მოცულობის წყლის მიღება შესაძლებელია. საექსპლუატაციო მარაგი წარმოდგენილია პროგნოზული (P)

კატეგორიით. წყლის გამოყენება შესაძლებელია კომუნალური და სოფლის წყალმომარაგებისათვის.

საინჟინრო-გეოლოგიური პირობების სირთულის მიხედვით ობიექტის ტერიტორია მიეკუთვნება I (მარტივ) კატეგორიას. აღნიშნული ტერიტორიის გეოდინამიკური სიტუაცია სტაბილურია, შესაბამისად, წიაღით სარგებლობის ობიექტის ექსპლუატაციისას რაიმე სახის გართულება მოსალოდნელი არ არის.

სკრინინგის განცხადების თანახმად, სალიცენზიო ობიექტი არ ხვდება სახელმწიფო ტყის ფონდის, დაცული ტერიტორიების, კულტურული მემკვიდრეობის ძეგლებთან სიახლოვეს, არც ტყით მჭიდროდ დაფარულ ტერიტორიაზე, სადაც გაბატონებულია საქართველოს „წითელი ნუსხით“ დაცული ხე-მცენარეები.

ვინაიდან სალიცენზიო ობიექტი უკვე მოწყობილია და შახტურ ჭებს გააჩნიათ თავმორთულობა, რომელიც შენარჩუნდება ექსპლუატაციის ბოლომდე და რაიმე სახის სამშენებლო სამუშაოები დაგეგმილი არ არის, მოსალოდნელი არ არის ნარჩენების წარმოქმნა და ზემოქმედება ნიადაგის ნაყოფიერ ფენაზე. ამასთან, საქმიანობის სპეციფიკიდან გამომდინარე, მოსალოდნელი არ არის ატმოსფერული ჰაერის დაბინძურება და ხმაურის დასაშვები დონის გადაჭარბება.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სამინისტროს ოფიციალურ ვებგვერდზე და ვანის მუნიციპალიტეტის მერიის საინფორმაციო დაფაზე. საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

წარმოდგენილი სკრინინგის განცხადების მიხედვით დგინდება, რომ ვანის მუნიციპალიტეტში, სოფ. სალხინოს მიმდებარე ტერიტორიაზე სასარგებლო წიაღისეულის - მიწისქვეშა მტკნარი წყლის სამეწარმეო მიზნით მოპოვება (440 000 მ<sup>3</sup>/წელიწადში) არ გამოწვევს მნიშვნელოვან ზემოქმედებას გარემოზე.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსის“ მე-7 მუხლის მე-6 ნაწილის და ამავე კოდექსის II დანართის მე-2 პუნქტის 2.2 ქვეპუნქტის საფუძველზე,

### **ვ ბ რ ძ ა ნ ე ბ:**

1. მიღებულ იქნეს სკრინინგის გადაწყვეტილება, რომ ვანის მუნიციპალიტეტში, სოფ. სალხინოს მიმდებარე ტერიტორიაზე მიწისქვეშა მტკნარი წყლის (440 000 მ<sup>3</sup>/წელიწადში) სამეწარმეო მიზნით მოპოვება **არ დაექვემდებაროს** გარემოზე ზემოქმედების შეფასებას;
2. ლიცენზიის მფლობელი ვალდებულია „გარემოსდაცვითი შეფასების კოდექსის“ მე-7 მუხლის მე-8 ნაწილის შესაბამისად უზრუნველყოს გარემოსდაცვითი ტექნიკური რეგლამენტებით დადგენილი მოთხოვნებისა და გარემოსდაცვითი ნორმების დაცვა;
3. ბრძანება დაუყოვნებლივ გაეგზავნოს სსიპ „წიაღის ეროვნულ სააგენტოს“;
4. ბრძანება ძალაში შევიდეს სსიპ „წიაღის ეროვნული სააგენტოს“ მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში აღნიშნული გადაწყვეტილება განთავსდეს სამინისტროს ოფიციალურ ვებგვერდზე და ვანის

მუნიციპალიტეტის აღმასრულებელი ან/და წარმომადგენლობითი ორგანოს  
საინფორმაციო დაფაზე;

6. ბრძანება შეიძლება გასაჩივრდეს თბილისის საქალაქო სასამართლოს  
ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-  
12 კმ. N6) მხარის მიერ მისი ოფიციალური წესით გაცნობის დღიდან ერთი თვის  
ვადაში

ლევან დავითაშვილი



მინისტრი